



UNIVERSITÄTS-
BIBLIOTHEK
PADERBORN

Arbor Vitæ Sive Vita Et Doctrina Christi

Ex Quatuor Evangeliiis In Meditationes Quotidianas Velvti Totidem Ramos
Distributa

Illsung, Jakob

Dilingæ, 1693

Meditatio CCCXVIII. Continuatio ejusdem Historiæ.

[urn:nbn:de:hbz:466:1-60727](https://nbn-resolving.org/urn:nbn:de:hbz:466:1-60727)

stabile domicilium propter habitus malos habuit, reclamante, & reluctante nostra corrupta natura, exclamat quidem, & multum discerpit nos; sed hoc clamore, sicut Christus, terreri non debemus, quin antiquum hospitem serio & constanti decreto expellamus, & nos ipsos per internam ac externam Mortificationem mortuis similes faciamus; ut in vero sensu etiam dici possit: *Quia mortuus est.*

PUNCT. III. *JESVS autem tenens manum ejus, elevavit eum, & surrexit.* Marc. v. 26. Sic à peccatis, malis consuetudinibus, & habitibus per vires naturales & proprias ad Vitam Spiritualem & ad operationes Vitæ Spiritualis surgere non possemus, nisi DEVS manum nostram teneret, & apprehenderet per Gratiā, nec per subtractum auxilium Gratiæ retraheret. Quemadmodum verò nemo vitam corporalem sibi adimit, spe miraculosæ Resuscitationis; ita nec Spiritualem sibi quisquam auferat, cum æquè parum suis viribus & conatu ad eandem resurgere queat; & præterea per ipsam Animæ mortem se indignum reddat gratuita Resuscitatione Divina.

MEDITATIO CCCXVIII.

Continuatio ejusdem Historiæ.

PUNCTUM I. *Tunc accesserunt Discipuli ad JESVM secretò, & dixerunt: Quare nos non potuimus eijcere illum? Dixit illis JESVS: propter incredulitatem vestram.* Matth. 17. v. 18. Sic postquam cum turba in procuranda Salute Proximi versati sumus, familiari ad DEVM regressu ab eadem identidem nos subducere

debemus frequenti animi Recollectione , mentis per Examen discussione , nostrique per Meditationem cognitione , & investigatione causarum impedientium Proximi Salutem , ac Conversionem : quas poterit non tam ex parte Proximi , quàm ex nostra tenere ; sicut ex Discipulorum exigua Fide , & Fiducia accidit , ut nequirent eijcere malignum , & mutum Spiritum.

PUNCT. II. *Dixit illis IESVS : propter incredulitatem vestram. Amen quippe dico vobis : si habueritis Fidem , sicut granum sinapis , dicetis monti huic : transi hinc illuc , & transibit , & nihil impossibile erit vobis. Matth. 17. v. 19*
 Per Fidem , ut patet , intelligitur hinc Fiducia , seu Confidentia in DEUM , quæ tam efficax ad Conversionem Proximi à Christo asseritur , ut , etiam si liberatione suæ perversitatis sit similis homini muto , per simè à diabolo habito , & ipsius Conversio nobis sit tam difficilis , quàm montis transportatio , tamè per Divinam Gratiam & Auxilium tam facilis futura sit , quam si solo verbo montem aliò transferre concessum esset.
 Debet autem ista nostra Fides esse parva , sicut granum sinapis , scilicet per Humilitatem , & Diffidentiam de nostris viribus ; & simul efficax , per usum mediorum : sicut granum sinapis Solis & Cælestium radiorum influxibus (quibus æquè indiget , quàm nos indigemus Auxilijs Divinis) cooperando , nihil ex parte sua negligit , ut in arborem excrescat. Erit autem Fides nostra talis , si de nullius hominis Salute & emendatione desperemus , DEO confisi. Similem Fiduciam habere debemus ad eijciendum ex Anima nostra quemcunque Spiritum malignum , & consuetudinem vitiosam , quamvis radicatum.

PUNCT.

PUNCT. III. *Hoc autem genus non eiicitur, nisi per Orationem & Jejunium.* Matth. 17. v. 20. Scilicet hominis peccatoris Conversio, vel nostrî ipsorum emendatio non efficaciter procuratur sine his duobus (ad quæ assumenda non nisi firma Fiducia inducit) nempe sine Oratione impetrante specialia Auxilia, & intellectum nostrum illustrante, ut videat, aliisque proponat proportionata media, ac motiva; & sine Mortificatione, quæ est Jejunium & Abstinencia ab omni affectu intemperante & immoderato ad creaturas, vel etiam corporis qualiscunque afflictatio. Unde pro Conversione Animarum privatæ instructioni, & admonitioni adjungenda est Oratio, & pænaliū Operum usurpatio.

MEDITATIO CCCXIX.

Christus iterum Apostolis Passionem suam prænunciat.

Matth. 17. v. 21. Marc. 9. v. 29. Luc. 9. v. 44.

PUNCTUM I. *Et inde profecti prætergrediebantur Galilæam* (id est, festinantes transibant Galilæam, in qua teste Matthæo versabantur) *Docebat autem Discipulos suos, & dicebat illis: quoniam Filius hominis tradetur in manus hominum, & occident eum, & occisus tertia die resurget.* Marc. 9. v. 29. Hoc Vaticinium eorum, quæ passurus erat, Christus Discipulis suis sæpius repetiit, ut eorum eventu eò minùs scandalizarentur, sed potiùs ad Imitationem incitarentur tum ipsi Apostoli, tum nos, qui illud eramus lecturi, vel meditaturi. Nam etiam nos in manus hominum tradimur, cùm

DEVS